



OPĆINSKI SUD U ZENICI

Broj : 043-0-Su-20-001202-1
Zenica, 01.09.2021.godine

Na osnovu člana 31., a u vezi sa članom 45. i članom 46. Zakona o sudovima u Federaciji Bosne i Hercegovine („Službene novine Federacije BiH“, broj 38/05, 22/06, 63/10, 72/10, 7/13 i 52/14), člana 8. tačka j) Pravilnika o unutrašnjem sudskom poslovanju („Službeni glasnik BiH“, broj 66/2012 i 40/14), člana 46. i 47. Pravilnika o unutrašnjoj organizaciji i sistematizaciji radnih mjesta Općinskog suda u Zenici broj 043-0-Su-10-000 221 od 25.01.2010.godine, predsjednica Općinskog suda u Zenici, donosi

PRAVILNIK

o postupku prijema, kriterijima za izbor i postupku izbora sudskih pripravnika i sudskih pripravnika-volontera u Općinskom sudu u Zenici

OSNOVNE ODREDBE

Član 1.

Ovim pravilnikom utvrđuje se postupak prijema, kriteriji za izbor i postupak izbora sudskih pripravnika (u daljnjem tekstu : pripravnici), i sudskih pripravnika -volontera (u daljnjem tekstu: pripravnici-volonteri), VII stepen stručne spreme ili visokog obrazovanja Bolonjskog sistema studiranja.

Član 2.

Pod pripravnikom, u smislu ovog pravilnika, podrazumijeva se lice koje poslije stečene visoke stručne spreme nema radnog iskustva, već se prvi put zapošljava sa ciljem obavljanja pripravnčkog staža.

Pod pripravnikom-volonterom, u smislu ovog pravilnika, podrazumijeva se lice koje se poslije stečene visoke stručne spreme prima u Sud, na stručno osposobljavanje za samostalan rad u struci, bez zasnivanja radnog odnosa.

Lice koje nakon stečene visoke stručne spreme ima ostvaren radni staž u struci ili radno iskustvo u struci stečeno volontiranjem od dvije godine ili više, ne može se primiti u radni odnos kao pripravnik, odnosno na stručno osposobljavanje kao pripravnik-volonter.

POSTUPAK PRIJEMA PRIPRAVNIKA I PRIPRAVNIKA-VOLONTERA

Član 3.

Odluku o potrebi prijema pripravnika ili pripravnika-volontera donosi predsjednica Suda u skladu sa brojem pripravnika, odnosno pripravnika-volontera, predviđenim Pravilnikom o unutrašnjoj organizaciji i sistematizaciji radnih mjesta Općinskog suda u Zenici.

Član 4.

Na osnovu odluke iz člana 3. ovog pravilnika, predsjednica Suda raspisuje javni konkurs koji sadrži:

- naznaku da li se radi o prijemu pripravnika ili pripravnika-volontera;
- naziv i sjedište Suda;
- opće uslove utvrđene u članu 25. Zakona o državnoj službi u Federaciji Bosne i Hercegovine;
- vrstu visoke stručne spreme;

- naznaku da se izbor i prijem pripravnika i pripravnika-volontera vrši u skladu sa kriterijima utvrđenim u ovom pravilniku;
- napomenu da se radni odnos pripravnika zasniva na jednu godinu ili duže, ako je to posebnim zakonom propisano;
- napomena da se pripravnik-volonter prima u Sud, na stručno osposobljavanje za samostalan rad u struci, bez zasnivanja radnog odnosa;
- spisak potrebnih dokumenata kojima se dokazuje ispunjavanje uslova konkursa;
- rok za podnošenje prijava, mjesto i način dostavljanja.

Javni konkurs za prijem pripravnika objavljuje se u jednom dnevnom listu koji izlazi na cijeloj teritoriji Bosne i Hercegovine i web stranici Suda.

Javni konkurs za prijem pripravnika-volontera objavljuje se na web stranici Suda. Rok za podnošenje prijava ne može biti kraći od 15 dana od dana objave konkursa.

Rok za podnošenje prijava počinje teći narednog dana od dana objavljivanja javnog konkursa u dnevnom listu, odnosno web stranici Suda.

KRITERIJI ZA IZBOR PRIPRAVNIKA I PRIPRAVNIKA-VOLONTERA

Član 5.

Za izbor pripravnika ili pripravnika -volontera u Sudu utvrđuju se slijedeći kriteriji:

1. prosjek ocjena završenog studija;
2. invalidnost.

Kandidati koji se prijave na javni konkurs za prijem pripravnika ili pripravnika-volontera uz prijavu prilažu dokaze za vrednovanje kriterija iz stava 1. ovog člana.

Dokazi mogu biti u originalu ili ovjerenoj fotokopiji.

Ukoliko kandidat ne dostavi dokaz za neki od kriterija iz stava 1. ovog člana, neće biti bodovan po tom osnovu.

Član 6.

Za prosjek ocjena završenog studija dodjeljuju se slijedeći bodovi:

Kod sistema ocjenjivanja od „pet“ do „deset“:

Za prosjek ocjena od 6,50 do 6,99	3 boda
Za prosjek ocjena od 7 do 7,49	5 bodova
Za prosjek ocjena od 7,50 do 7,99	7 bodova
Za prosjek ocjena od 8 do 8,49	9 bodova
Za prosjek ocjena od 8,50 do 8,99	11 bodova
Za prosjek ocjena od 9 do 9,49	13 bodova
Za prosjek ocjena od 9,50 do 9,99	15 bodova
Za prosjek ocjena 10	20 bodova

Kod sistema ocjenjivanja od „jedan“ do „pet“

Za prosjek ocjena od 2,50 do 2,99	3 boda
Za prosjek ocjena od 3 do 3,49	6 bodova
Za prosjek ocjena od 3,50 do 3,99	9 bodova
Za prosjek ocjena od 4 do 4,49	12 bodova

Za prosjek ocjena od	4,50 do 4,99	15 bodova
Za prosjek ocjena	5	20 bodova

Član 7.

Ako kandidat ima invalidnost 60% i više dodjeljuje se 5 bodova.

POSTUPAK IZBORA PRIPRAVNIKA I PRIPRAVNIKA-VOLONTERA

Član 8.

Postupak izbora provodi Komisija za izbor (u daljem tekstu : Komisija), koju imenuje predsjednica Suda. Komisija ima tri člana koji moraju imati visoku stručnu spremu.

Član 9.

Komisija razmatra pristigle prijave i utvrđuje redoslijed kandidata na osnovu ukupnog zbira bodova dodijeljenih u skladu sa kriterijima iz člana 6. i 7. ovog pravilnika. Nepotpune i neblagovremene prijave, kao i prijave kandidata koji ne ispunjavaju uslove javnog konkursa, Komisija neće uzeti u razmatranje.

Član 10.

Predsjedavajući komisije dostavlja listu kandidata iz člana 9. stav 1. ovog pravilnika predsjednici Suda . Lista kandidata iz prethodnog stava ovog člana sadrži: naziv liste sa nazivom ovog suda, mjesto, datum i vrijeme sačinjavanja liste, redni broj koji označava redoslijed kandidata na listi, broj bodova ostvaren po kriterijima iz člana 6. i 7. ovog pravilnika i ukupan broj bodova, prebivalište i adresu kandidata, potpis predsjedavajućeg i članova komisije.

Član 11.

Odluku o izboru pripravnika donosi predsjednica Suda u formi rješenja, a sa pripravnikom-volonterom zaključuje se ugovor, u roku od 5 dana od dana kada Komisija za izbor formira listu uspješnih kandidata. Za pripravnika i pripravnika-volontera prima se kandidat sa najvećim brojem bodova. Ukoliko se u Sud primaju dva ili više pripravnika ili pripravnika-volontera prijem se vrši po redoslijedu utvrđenom u skladu sa članom 10. stav 2. ovog pravilnika. Ako dva ili više kandidata imaju isti broj bodova, prednost ima kandidat koji je ostvario više bodova po prvom ili sljedećem kriteriju iz člana 5. stav 1. ovog pravilnika. Izuzetno od odredbe stava 3. ovog člana, u slučaju kada se na listi nalazi više od jednog kandidata, predsjednica Suda, u cilju zadovoljavanja principa iz člana 2. Zakona o državnoj službi u Federaciji Bosne i Hercegovine, može izvršiti prijem kandidata, mimo redoslijeda utvrđenog u članu 10. stav 1. ovog pravilnika, pod uslovom da je taj kandidat ostvario najmanje jednu polovinu bodova koji je ostvario kandidat sa najvećim brojem bodova, poštujući utvrđeni redoslijed kandidata iz istog konstitutivnog naroda, odnosno iz reda ostalih.

Član 12.

Rješenje o izboru i prijemu pripravnika iz člana 11. stav 1. ovog pravilnika, predsjednica Suda je dužna dostaviti kandidatu koji je izabran. O izvršenom izboru i prijemu pripravnika ili pripravnika-volontera, o ostvarenom redoslijedu, broju bodova na listi kandidata predsjednica Suda u pisanoj formi obavještava sve kandidate koji se nalaze na listi. Nakon izvršenog izbora pripravnik ili pripravnik-volonter dužan je predložiti uvjerenje o nevođenju krivičnog postupka.

Član 13.

Kandidati čije prijave nisu razmatrane zato što su neblagovremene, nepotpune ili zbog neispunjavanja uslova konkursa, odnosno koji smatraju da postupak izbora ili prijema pripravnika ili pripravnika-volontera nije izvršen u skladu sa propisima, mogu u roku od 15 dana od dana prijema obavještenja iz člana 12. stav 2. ovog pravilnika izjaviti žalbu predsjednici Suda.

USLOVI RADA

Član 14.


Pripravnici i pripravnici-volonteri imaju pravo na naknadu koja je utvrđena zakonom i podzakonskim propisima.

PRELAZNE I ZAVRŠNE ODREDBE

Član 15.

Ovaj pravilnik stupa na snagu danom donošenja, a objavit će se na web stranici Suda.

Stupanjem na snagu ovog pravilnika prestaje da važi Pravilnik o postupku prijema, kriterijima za izbor i postupku izbora sudskih pripravnika i sudskih pripravnika-volontera u Općinskom sudu u Zenici, broj 043-0-Su-20-001202 od 06.08.2020.godine.



Predsjednica suda
Dženana Brković, MA iur.